



雪邨詩序



書曰詩言志記曰志之所至詩亦至焉詩發乎情  
境昔少陵叙詩兼叙年譜後之人讀其詩推其時之所遇  
因以想見其情歡愉悲憤概可知也新都王子雪邨騷人  
耶才士耶蘊蓄遙深未獲展其生平而酒邊花下月夕風  
晨以及遊覽登涉往來酬贈之際有所感觸輒發之於詩  
以寄托所懷余來邗上王子適棲遲其地遂得以文章交  
已亥秋余在真州督課之暇閒似野人冷如僧舍惟假一

編以自娛王子携所著敬餘堂詩鈔雪邨歷年詩二帙來  
問叙于余、惟揚州夙稱繁華地聲歌徵逐貨賄相先王  
子獨抱風雅之志飄々鶴立瀟然自別殆亦風塵外物歟  
其所為詩蘊藉風流出入王孟間而時一露其慷慨激昂  
之意噫觀王子之詩可以見王子之才之遇亦可以知王  
子之志矣爰書此以授之

皆

康熙己亥秋杪圖園張應詔書於真州官舍



間時不見雪村王先生偶叩其門入其齋則先生  
貌癯甚自言其病而神明朗健不減向時余驚而  
慰之蓋先生久不接賓客而余之疎先生久矣往  
時讀先生詩嘗愛之欲爲之序已而不果今復示  
余近詩則語益加鍊氣益加卓境益加幽先生其  
得詩之趣者乎抑爲之不已而進於是也耶昔高  
達夫五十始工詩杜少陵詩所傳者皆晚齒之作  
古之傳人必旣老而詩格始定况次此者乎讀古

人詩見工力必在暮年今見先生詩何其契余素  
心哉先生素篤友朋之誼畢文岵谷有梅花集句  
百首岵谷歿數年先生爲付之削氏夫平居握手  
甚歡久而遂忘之者不可指數况身之旣歿而追  
梓其詩豈非終始不忘故舊乎夫必內有真摯之  
性而後詩有溫厚之氣先生詩之可傳其在此也  
庚子冬日同學弟費錫璜撰



雪邨歷年詩

新都王

訪撰

鑿江黃 琮叅

成都費錫璜閱

甲午

黃光祿礪山招看梅花

徑幽寒雜樹風暖引南枝歷盡清霜境纔舒白雪  
姿雲漫遲影亂月上暗芳移山谷延東閣金罍酒

滿持

雨後看梅花

鐵幹柔枝古輕風細雨斜如酥融凍雪似醉著寒  
花水部方延賞參軍莫漫嗟祇愁明月下孃孃上  
窓紗

黃泌水自真州過訪適余臥病未得泛舟

春遊賦此志慨

七十七翁步履輕念年差長暗慚驚看君矍鑠心

猶壯歎我支離淚自盈庭花半落門還閉野水新  
添舟漫橫病裏光陰長似歲竹西煙柳負春城

又

去冬右足近跛跚纔得舒徐左手胖肝氣鬱深根  
附遠春陰遲發餌投難九旬冀北當年悴廿四橋  
西此日寒草草空悲三鏡髮對君不禁淚闌干

贈別泌水

君去真州足倡和桃花塢裏樂婆娑四年一鼓邗

江權信宿停橈不肯多

寂寥君去復誰人門掩臺花一院春南陌西園車馬客夕陽半醉走紅塵

幾回訂子汎虹橋拄杖來時我病驕風雨一燈兩點淚隨君帆影下春潮

臥聞

人生幾度春三月最好韶光病裏過宛轉嬌鶯來柳外誰家簫鼓夕陽多

臥病

病染寒梅發春殘臥聽鷓鴣砌花頰一院甌藥蹙雙眉夜想晨光早晝嫌夕照遲曲欄強徙倚片刻似

三時

病起

一臥三春暮晝長靜掩扉庸醫收晚效乳燕引初飛雨為存花細風因落絮微竹鑪停藥火煮茗對斜暉

夢別所思

夢裏銷魂處殷勤話別難微醺紅杏褪嫩蕊白雲  
寒脉脉持衣袂行行乏羽翰覺來堪下淚俯仰憶  
長歎

次韻奉荅黃泌水賞芍藥見懷之作

殿春花歇繼風流浥露叢披曲檻收粉淡蜂鬚沾  
滑膩香清蝶翅拂嬌柔愁看暮雨尊前別閒卷浮  
雲月下幽一水盈盈遙贈芍故人穩坐老真州

瓜渚阻風

瓜渚南風勁京江北浪重崩騰羣怪集欹側片帆  
洶碧落闔紅日晴波走白龍金焦雙在目無計到  
高峰

胥門懷古

軍威百戰佐昇平虎踞東藩霸業橫自聽簧言疎  
逆耳誰耽狐媚不傾城雙眸詎忍看吳沼孤魄猶  
能懾越兵風色蕭蕭忠骨冷可憐湖水至今清

夏至日遇友人水閣納涼

得涼字

分袂初冬候相逢喜晝長微陰含水動烈日滅山  
光葦密江風小樓孤嶺月涼舉杯論疾苦不死興  
飛揚

夏至後二日天氣如秋聊賦短句以志之

綌衣前日汗如流布褐今朝風更颭萬里火雲歸  
萬壑三山明月似三秋

水檻遣心

墨雲釀雨晚生涼兩岸扶疎透夕陽烏擇幽叢棲  
樹穩魚因淺瀨趁潮忙一灣抱閣閒垂釣幾處憑  
欄漫舉觴長笛悠然漁艇出自知吾道在滄浪

金陵弔古

六朝何恃尚風流浩淼長江枕石頭上下偏安忘  
國是迄今烟草滿城秋

水樓歌吹

倚檻歌金縷臨風和玉簫悠揚吞嶺月嘹亮咽江

潮急瀨遙相荅行雲遠見招情牽周小史腸斷董  
嬌饒

代友人作

淚灑西風忍別離琵琶一曲兩心知繡幃人靜春  
風夜紅藥花開露滴時

臺閣梅花

暗香飄後獨徘徊遲日寒光重疊開雪滿林梢披  
繡閣月明枝上拂瑤臺寸心高下天營度細辨參

差風剪裁水部廣陵曾見否空山幻出白雲堆

殘暑初退小閣新涼沽酒斟酌以志喜

南薰朝暑炙西閣晚風狂簟捲湘雲溼簾窺海月  
涼漸欣山變紫還惜柚初黃蘿壁絺衣挂鄰沽酒  
倍香

水閣雨霽遲友人小酌看月余將別去

雨洗疎林葉半黃一彎新水覆垂楊鱸肥秋後蓴  
偏美酒熟燈前橘正香西北風來雲慘淡東南潮

浸月蒼茫舉杯莫厭頻相勸明日孤舟歎滿梁

九月一日黃泌水費滋衡潘海觀柳廷章

讌集荷花館

為言夏日酷攜手愛秋光踏遍空林葉來飛野店

觴蘆高風有韻荷盡水無香遮莫村醪醉渡頭滿

夕陽

尋秋

落日照城郭行行步晚嵐水光澄渡口山色翠江

南為問東籬菊因尋西浦菴到來香茗出浮世接

僧談

泌水移居

茅屋原堪賦遷喬意不然菰蘆驅翹翹泌水苦於身窮市井

寄雲烟綠是階前樹清為沼內泉一丘欣有託觴

詠樂餘年

簫

圓瑩隨喉轉悠揚韻獨幽臺空朱鳳寂人去白雲

留月淡星稀夜天寒木落秋纖纖勤玉指腸斷倚  
高樓

天台山

拂雲上層崖坦步入幽谷暗艷疎野花浮翠密叢  
竹路僻回飛鳥崖懸置僧屋盂飯虎同餐衣晒狐  
坦腹籟靜候谿風泉流飛山麓谿達陰雲悶嶙峋  
石橋獨日暝耀衆峰月上響諸木昔聞採藥翁流  
連此信宿

北上早發

茅店雞聲促整鞍月光斜照曉風寒低迷馬上人  
猶夢拂拭衣間露未乾曖曖漸看村落近漫漫前  
去道途寬虛名贏得成何益輸却今朝行路難

清明日暢春苑作

氣候於今南北同清明桃李笑春風晴霞一院紅  
塵外曉霧千門白雪中沙軟平堤調駿馬水流曲  
澗繞行宮君王別殿耽幽賞日夕西山對晚虹

曉發金臺。皇華賦罷喜南旋。曉霧春殘壓錦韉。兩袖莫嫌風露冷。一鞭閒撲柳花妍。低徊海殿恩猶在。歸去江干興自偏。不憚關山雲路杳。鱗魚到日筍仍鮮。

北歸晚宿

雞鳴騎馬至雞栖。終日昏昏倦四蹄。宿店逢人詢遠近。危途憑僕報高低。村墟晚爨迷官柳。酒肆懸燈照大堤。遙憶故園勞客夢。花陰新月幾回移。

乙未

梅花落

庭前森雜樹。何為爾咨嗟。幹鐵多經雪。枝柔不在花。浮雲新翠滿。落月暗陰斜。無那梅黃日。蕭蕭雨萬家。

六月放舟吳下寓懷

有事吳下目擊時艱兼慨一大位迷而不去賦詩六章

連朝風雨逆行舟。漭沆陂塘六月秋。新漲奔濤山澗怒。餘音繞樹野禽幽。平江直下平無土。驛路橫

流驛有樓堪笑往來名利客漁歌空羨出滄洲

又

水下東流舟復輕長歌扣櫂到吳城伍胥敢諫風  
猶烈范子行成氣自平天位不貪如歲序人謀何  
苦費經營共知禍福原相倚誰脫簪纓效力耕

吳田淹沒輶輶遠聽乃桔槔洩水之聲賦

此志慨

香杭遍蒔色蒼蒼浩淼波光浸夕陽始信桔槔能

濟旱如何洩水萬人忙

河連阡陌無高下力盡拮据何處消纔洩一分天  
又雨可憐魚鱉食秧苗

山谷吐雲雲不歸家家散作雨霏微蒹葭澤畔人  
烟起農失耕耘守釣磯

老農荷笠向田勞何處登臨隙地高乍見香杭微  
露杪一聲金響萬人號

次韻贈黃蓮陂五裘放舟雉臯之作

君行五十氣橫秋傲骨奚云似贅疣長劍倚雲浦

獄麓楚中譚卒之變君奔孤桐臨水滯揚州雍門有感

生悲泣卞璞無知泯怨尤牀滿圖書瓢滿酒一觴

一詠復何求

鸞音長嘯自清狂白眼看人鬪弱強兩岸寒蘆耽

去就三山明月寄行藏風波世上時時有名利江

干漸漸忘放舟阻風繪有祝嘏鳳毛樽酒待菜菹仔細

醉秋光

丙申

春陰

西嶺雲初卷東風雨色漫欲知春曉處微辨柳烟

寒池上冰猶合梅邊雪始殘晴郊沙路軟尊酒醉

山巒不

孝至驚魑魅節完邁古人當年雙臂肉萬載不生

塵皇天報令子釋褐列名臣司農結芝友當宁慶

嘉賓正展雲霄翼思調雨露均  
袞闕方資補高堂  
抱採薪倉皇乞終養迫切動紫宸  
須臾聞里訃慟  
哭解垂紳朝臣賫銘誄天子出褒綸  
匍匐長安道  
淚盈邗水濱都人相向哭感慨子榮親

次韻和荅泌水草橋之作

原注小陽月水流  
斷岸疊草可渡

潦水那堪跣足行濟川祇用草縱橫  
褰裳乍喜雙  
鞋軟題柱難容駟馬輕波上東  
芻成利涉海中驅  
石費經營銷魂野店當年夢却笑今朝遇此名

次韻庭梅同黃參軍子固李秀才亦啓賦

今春惟閏月萬卉寂寥中瘦質培寒雪遲未待暖  
風橫斜因地勢潔白信天工索笑雙梅下  
惡篇倡  
老翁

黃礪山招飲看海棠

得花  
字

石欄曲徑植名花綽約紅妝拂晚霞  
嫋嫋東風酣  
夢醒漾漾曉露睡容斜玉環無力  
愁尤媚山谷多  
情酒更賒却恨白頭春不管幾番開  
落幾番嗟

荷莊看牡丹

麋鹿銜來仙種花平章宅裏鬪奇葩絕憐雨後多  
憨態還愛風前屢舞斜妃子今朝濃艷處青蓮當  
日盡情誇朱欄翠幔誰持護莫訝偏開富貴家  
名稱第一人爭羨十里紅塵走馬看花發江南穀  
雨候影搖亭北彩雲攢春風嫋嫋清輝滿香霧濛  
濛夕照寒眼底韶光腸欲斷金罍頻勸莫辭乾

再至荷莊看牡丹來日春去

柳岸烟銷雪裏行重來樓閣曉雲晴露凝未改深  
紅色雨過還多新艷生孤月當花光不動杜鵑啼  
血恨難平春風邀勒何能住遮莫流連酒滿傾

賦得萬井鶯花雨後春

暖烟輕卷夕陽時風片悠揚雨帶絲處處嚶鳴巢  
綠柳家家爛熳溼紅枝舊濡畫板鞦韆滑新洗沙  
堤叱撥遲好鳥名花爭弄艷六街初月萬人怡

江干烟雨

層樓日日面江灣  
曉吐烟雲不見山  
細雨一蓑沙漫出  
斜風孤艇秣陵還  
迷離微辨菰蘆影  
遠近偏輸鷗鷺閒  
萬里幾人曾破浪  
何如檻外聽潺湲

讀蕙圃錄

乃汪節母雙割股奇孝事

天地之正氣在人  
一念初轉即移忠  
孝鬚眉愧丈夫  
盈盈閨中婦何嘗  
誦詩書至性猛發  
露身與仁義俱翁  
姑等父母夫子視  
天如一朝風逆浪  
何有孱弱軀汪母  
雙節孝已悉屈與  
吳不必再饒舌浮  
白醉地呼

真州河房

夾岸居民半虛閣  
一灣曲水晚潮落  
夕陽一半在

高樓無數垂楊月  
蕭索

進艇

棹小陵河岸潮平湧  
暮烟荒村孤繞樹  
野澗曲通船隴麥  
全登圃香秔半插  
田南來山色好獨  
坐興

悠然

半開亭北溪

佳人新得暮春天攜手花前看月圓却羨牡丹初  
滴露半開亭北影娟娟

君家閨閣倡相隨黃綠裳衣兩得宜叢卉縱橫開  
遍好全無風雨妒花枝

吳逢年暑月納寵

紗幘疎櫺竹簟涼衾裯半捲合歡牀巫雲一朵纔  
為雨玉骨微聞粉汗香  
晚風香拂解羅裳蕚嫩冰肌滑倚牀蘭燭教移羞

露影疎櫺斜月照鴛鴦

黃礪山行樂圖

瀟灑宗之風流子京逍遙一榻婉孌三人樂此晨  
夕遠世氛塵胡為乎瞪目有思抱膝有吟欲為伊  
呂之匡濟聊臥南陽之山林

祈雨得甘霖為張運憲賦

月餘不得雨草木曠欲焦池塘日就涸江海夜不  
潮農竈咸蹙額我公抱憂勞寵命膺特簡嘗思

雨露調嵯政次第舉淮南南北饒覩茲旱魃虐何  
忍民嗷嗷建壇躬祀禱慷慨淡意不驕赤日朝禮拜  
明月夜寂寥一誠上格帝風雨倏漂搖三十場歡  
忭億兆民歌謠乃歌曰公昔為牧嘗得甘霖有求  
必應至誠感神又歌曰官不愛錢民日晏眠上能  
儉守下自富有安得張公千百人分理天下永太  
平

飢民詩

王子維範去歲解囊於瓊花觀中施藥活億  
萬病人今夏道憲跡其事亦於觀中命兩淮  
設藥以醫人徵王子董之嘉其仁且公也聞  
有一飢民就醫事余作歌以表之

江海蕩浮萍溝壑待志士萍逢會有期士死無屈  
志昭陽有餓者貿貿來城市不言腸中飢但云腹  
內疾攜幼來就醫行路苦無力遙望觀峩峩迢迢  
遠莫致午餘藥市休爺女昏踟地問訊羸弱軀口

訥氣莫繼骨肉云五人死亡存其二烏雞不能哺  
鷓蘿何處施熟視非疾疾實為飢所使呼僮出羹  
糜對食雙垂淚如推爺啜舖爺向女多餒須臾喉  
中音氣舒言媿媿木衰冬雪摧草萌春風吹縉餘  
百五錢贈爾供糗糒爺女長跪拜餘生實君賜我  
聞心愴悲感子施恩義慚無絕妙詞處處明君意

秋雨懷人

多時夏去暑仍留一夕陰森旱氣收颯颯林間新

雨過涓涓石上細泉流行看蕩漾滄浪月坐對蕭  
疎蘆荻秋邗水鑿江程七十輕舟不憚溯洄遊

輓江允明夫人

弱質盈盈二十餘克全節烈勝鬚眉同衾永矢還  
同穴結愛彌深始結褵割肉一鬻君子病殘生兩  
月藐孤遺從今信作鴛鴦伴梁孟泉臺舉案時

賀張圖園運憲攝院篆

巡視淮隄仰福星我公攝篆福星臨海邊行賈羣

依命雲際飛龍簡在心舊日繇華將滌盡新時雨  
露更霑深郊原碧草回春色到處黃鸝多好音

輓汪瀚若夫人

華嶽峒峒江漢清高深萬古擬貞名花顏瘦盡慵  
持箸血淚枯餘對短檠已散千金酬戚里未亡百  
日費經營遺謀繼述雛雙立含笑泉臺梁孟并

丙申歲中秋有感

早氣連朝甚火雲蒸月明如何秋半候不見暑全

平疊雪嫌羅重合風愛葛輕今春如未閏霜落滿

江城

又

庭前雙桂樹日漑蕊猶堅用盡四支力方知一雨  
便村荒犬吠月農餓竈沉烟聞道西山井千尋不  
見泉

又

蕪城襍穢子桂玉不關心玩月朝朝滿銜杯夜夜

深醉歌邊塞曲笑指雍門琴誰說荒年穀吾家頗  
有金

九月一日遊黃光祿林園

郭外蕭蕭蘆葦天同人坦步到林泉稻收雲水中  
秋後人立崔嵬重九前楓葉殷紅翻夕照桂花芬  
馥入寒烟東籬帶蕊還遲醉山谷從來逸興偏

桂叢小飲

移席桂林面面花鉤衣刺目任橫斜夕陽返照身

埋影香氣薰蒸酒興賒

題贈易司錄別業

連牆曲院布林巒半閣迴廊百卉攢翠竹千霄遲  
綵鳳碧梧匝地蔭雕欄一生湖海當年志三徑柴  
桑此日安堪羨尚平心願了斑衣堂上更承歡

題易子別業次吳虞三元韻

卜築城東市地囂人自偏梧桐深院靜薜荔曲廊  
便風裊聞山遠臺高見月先寂寥欄檻外身世總

茫然... 又

橘柚知秋老流光逐物移行藏誤往昔勲業歎如斯子已輝堂構余將雪鬢垂高歌徹林杪不禁涕

漫遊

又

豪氣三千丈芝蘭誼不疎管貧知鮑子儀偽誑商於雲雨原無定人情靡有初看君多道意自大于公間

黃參軍堂上菊花

遍覓東籬下君家四壁光蕭疎寒月影暗淡晚風香燦燦頻資水亭亭不畏霜稻梁逢歲旱何處得

秋芳

壽受菴上人

驚冷雪將滿星迴歲欲除坦懷忘甲子白眼看盈

虛舉世忙無定一生閒有餘毒龍常自制孤鶴共

舒徐

西湖

近山闕處遠山青圍却湖光不漏星堤柳風來春

浪軟鶯聲嬌囀最堪聽

放舟

一棹初冬發風微愛夕陽深山翠紫遠近樹紅

黃水落荒龍窟天空廓雁行飛蓬霜雪滿猶作嫁

衣裳

隔河見小史

楊柳岸蕭疎芙蓉出寒沼初日照清波婉孌十五

小有時弄釣絲轉側溪邊繞素質間微紅曲眉目

雙皎善笑美圓頤臨風言更巧輕裾類行雲翩翩

勝窈窕夕陽隱翠微  
新月上樹杪盈盈一水闌  
脉情多少

讀曲歌

絲髮未被肩郎來騎竹馬  
郎去儂不許牽衣繞梅  
下

空房偏畫永含情付鍼線  
淚斑不用浣留與郎眼  
見

烏白鳥想爾無匹偶  
夜夜獨啼曉

丁酉

春花燈月夜為黃光祿易園賦

十二樓前閨苑邊  
風恬日煖蕩輕烟  
氤氳玉砌梅爭艷  
隱耀朱欄月欲偏  
九陌花寒春霧斂  
萬枝燈焰夜珠圓  
水晶刺目團香雪  
不羨蓬萊海上仙

庭梅

寂寥襟樹繞階除  
春到梅花總不如  
氣動黃昏風細細  
影橫清夜月疎疎  
孤山雪盡頻搖曳  
庾嶺雲

漫任卷舒無那輕盈羸瘦質一翻風雨一欵戲

壽康山吳節母

母德高華嶽康山日杖藜七旬稱壽域四十守孀  
閨不是堅冰操那邀彩鳳齊東茶西蔗味把酒聽

黃鸝

春晝對梅花

步屨雙梅下千回不厭偏天青看皎皎頭白共娟  
娟寂寞春雲淡輝光晴日妍悠然人境外誰使俗

情牽

畢容齋招賞玉蘭步蓮陂韻

月明何處柳枝詞勸爾良宵金屈卮醉眼臨風看  
玉樹美人南國鬪凝脂

插天直幹百尋餘雪滿枝頭照里居霜鬢三人誰  
更白娟娟花下倍慚予

風流吏部晚熊羆叔度門牆年少時  
容齋高弟黃寅旭在座今

夜花前如立雪玉堂他日共稱奇  
容齋晚年得子

杏花

次韻

疎梅嫩柳弄鶯聲十里明霞吐曉英酒漉文君壚  
拂艷牆欹宋玉雨初晴綺樓人醉春風軟香徑魂  
迷夜月情却羨上林花正滿路傍惆悵一枝橫

渡江

二年未向江南路一見峰巒情倍親久別故園逢  
故友流連却訝夢中身

汪四敬思新得佳寵

真州記得同閒擬妒殺逢丹二阿嬌一在暮春一  
仲夏綢繆寒暑兩情驕

寂莫妝樓已四年長拋玉軫任離絃閨房今夜添  
鴛侶不羨牽牛織女仙

繡幙風微五月寒霏霏霧雨綵衣單瓜期碧玉還  
羞破顛倒情郎迴抱看

衫透凝脂疊雪輕香含煖處引入情潘郎美滿溫  
如玉遮莫蕭娘傍五更

賦得淮南遊客馬連嘶碧草迷人歸不得  
即用温助教錢塘曲原韻

館娃宫外烟如織碧草四時作春色岸上垂鞭白  
面郎紫騮蹀躞歸不得嬌嬈紗舞逐飛烟靜婉清  
歌亂急絃揚州公子醉綺筵柔情飄蕩如流泉

平江

平江蕩漾小舟閒纜急帆懸任往還  
霽雨空濛烟樹影分明一幅米家山

雲壓山頭露半腰青葱如待故人招可憐碌碌揚  
州客容易何曾盪一橈

賦得陂塘五月秋

綌衣才換晚風涼短褐旋披又夕陽登圃未完雲  
壓麥耕畝有待雨栽秧桔槔兩岸陂塘淺舟楫中  
流百丈長獨坐篷窓翻卷牘沽來泉酒倍生香

舟中

改罷新詩倦呼童煮酒嘗緩斟憐岸草滿酌慰舟

航雙僕晝眠穩孤帆夕照揚鳥棲明月下款乃一聲忙

虎丘偶見

虎丘一片石風雨不能忘前後山流靄高低樹夕陽橫塘波滑膩畫舫載紅妝薄暮貪遊處衣生細細香

惠山

前日迷離風雨急今朝新霽樹蒼蒼穿花汲得紅

泉美帶月烹來白茗香歷亂山椒橫翠靄寂寥星漢浸滄浪夢成幾破雙催槩一曲相思吳水傍

鎮江

金焦對綠峙中流江水滔滔何日休天地無心留宋土風雲有意送金舟鸛河指點千年恨龍窟荒涼萬古愁擊楫長歌悲往事一聲漁笛出滄洲

仲夏水閣喜晤沁水

水閣題詩處相思又隔年潮聲仍舊落柳色更新

妍雲過農忙雨月來漁弄烟對君矍鑠意不羨昔  
彭錢

納涼

連朝暑氣甚小閣敞黃昏一曲平欄水幾年分漢  
源魚遊新滿窟潮上舊時痕風晚來江口泠泠侑  
一尊

真州城東看荷花

十年前記西園宿三五嬋娟鬪綺霞皎潔不分天

上月氤氳始信水中花六郎自昔顏如玉潘岳於  
今鬢有華論舊一杯須盡醉城頭暮鼓又頻撾

九月黃泌水八十壽

黃花酒似青蓮美八十今如四十年璀璨裁成蘇  
蕙錦淋漓揮滿薛濤箋盃光對案雙眉白叔度澄  
波三子賢還有七千二百盞待君百歲醉君筵

又

江千秋氣落菊酒兩氤氳皎潔天心月卷舒嶺背

雲香山多逸韻渭水著遲勳惟有幽人意稱觴迥  
不羣

秋前五日秋聲大作小閣端居聊賦迎秋  
之什以待泌水一晤

風聲亂岸柳蕭瑟似迎秋  
盈雪香羅薄三湘碧簟  
流暑殘頻送雨月缺半明樓  
素友朝來訪相攜醉  
一甌

賦得風雨送涼秋

用涼字

信宿溪邊閣暫逃塵世忙  
有時三伏熱忽似九秋  
涼山雨洗新月江風漾  
夕陽早酬身事了漁艇狎  
滄浪

黃泌水板往汪蓬次舍人園內看海棠

名園結構伴庭基竹徑幽深百卉奇  
看到斷腸花  
艷處那堪殘夜月明時風前嫋嫋嬌無力  
燭下盈  
盈睡每遲山谷逢人曾說項汪倫  
今始挹芝眉  
黃光祿林園看桂花兼羨餘荷競艷

出郭看花興不窮秋來逸致友人同黃金綴滿繡  
枝外白玉開餘淺水中蓄洩寒潮量夏雨剪裁疎  
幹待春風分香今日勞持贈主人遍剪  
桂花贈人叔度當年幾  
許工

九日

重陽晴亦好風雨昨朝收沙輭平山路水添法海  
流汎萸雙眼醉插菊滿頭秋何處來歌吹竹西競  
晚遊

又

却怪夜來頻夢遠情腸兒女重低徊今朝採得東  
籬菊且汎燈前酒一杯

賀柳廷章新舉孝廉

宿昔文章羨爾工英詞果奪萬人雄天香秋半攀  
明月仙杏春叢探曉風共喜飛翻喬木杪獨慚偃  
息茂林中聞雞素有劉琨志努力垂雲盪碧空  
九月廿八日黃泌承招同潘海觀汪敬思

集飲雙清閣

雙清閣下飲老酒拆泥封三徑東籬菊一聲古寺  
鐘行還迷萬竹去復倚孤松當日山翁態兒童笑  
醉容

水樓

疎柳殘陽拂萬條西風吹小暮江潮水樓何處簫  
聲動兩岸芙蓉色不嬌

戊戌

立春日適值生辰有慨而作

碧空雲淨曙光高送臘東風雪盡消凍合江河徵  
歲稔煖融浦漱看春潮兩逢戊戌鸞長嘯遍歷寒  
暄客屢嘲論舊共憐新日月相攜且喜酒盈瓢

猛虎歎

李銀臺所蓄

當年晉司馬畏蜀真如虎甚哉虎之名悚懼自往  
古百獸同其羣爾為鷙猛主山林恣兇威橫暴不

循矩何年失負嵎。翻身落網罟。牙繡顧之歎。猛氣  
為偃僂。揮弄似猿猴。鍊組牽爾舞。勃勃還鬱鬱。微  
喘震門戶。觀者驚趨走。摩抄圍人撫。嗟哉勢與時。  
一失受人侮。

春夜宴黃光祿易園看梅花

深院傳春信沈沈。芳氣清帶星叢蕊。亂傲雪一枝  
橫。桃李從人媚。松筠結友情。詩成催叔度。金谷酒  
頻傾。

贈惠疇上人

何必空山裏。岩堯結道林。扣門知市隱。問法得禪  
心。白鶴閒池畔。青松冷月陰。衡茅欣接近。無事一  
相尋。

水閣觀梅適泌水臥病不至

正發揚州興。真江春信催。輕舟浮細草。怪石倚疎  
梅。可惜清芬地。難招素友來。胡牀雲臥冷。策杖煖  
徘徊。

雨舟

一夜霏微紅雨溼朝來鼓柁柳烟迷昏昏不識天  
遲早岸上人家叫晚雞

春日宴黃兵曹林園

雨後垂楊沙路輦肩輿五里到山扉竹竿裊裊含  
烟翠梅蕊稜稜帶雪肥幾點江南峰隱現一彎林  
外月依稀銀船散打花前飲遮莫更闌醉不歸

雨梅

氛埃全不染洗滌雨無聲皎潔凌雲淨光輝待月  
明瘦來偏闌淡溼處更縱橫寂寞蒼苔冷霏霏烟  
霧生

梅

庾嶺月明夜孤山雪後春紛華遺世慮寂寞倍精  
神偏喜高人賞而嫌俗子親一絲塵不挂清絕若  
誰隣

賀人二十壽

棄繻當日有終軍弱冠今時氣倚雲但識封侯投  
筆意常調駿馬恥論文

潘三濬九三十初度

最好春三月人逢卓立時桃花紅裏客楊柳綠邊  
巵醉臥邗江晚愁歸練水遲熊羆他日夢策馬問  
秋期

汪母潘恭人五十壽

伉儷松山秀河陽壺德宗饗殮頤節母昧且相司

農已致腰金寵還看庭桂穠五旬先進酒三萬六  
千鍾

易園看海棠

春來百種花齊發一見海棠情倍濃晚風裊裊扶  
嬌態早月纖纖照睡容無忌西園頻縱飲莫愁南  
國喜重逢傾城名士稱雙美斜倚石欄興未慵

春盡有感

脉脉韶光盡昏昏且歲時不知春變夏却訝鬢添

絲絮落雪千點鶻啼血滿枝少年看勇猛老大意  
俱遲

雨過荷莊

芰荷烟霧裏一棹到池塘風動珠頻轉雨催蕊拆

香舉杯論舊友下淚惜殘陽

黃礪山歎  
老友凋零

歎息濂溪去

空餘媚六郎

挽徐嘯亭州牧

之子盛文采晤對如春釀清瑩俊逸姿奇偉魁梧

狀豐芑紹詒謀平生志祿養皇天假以年展為家  
國望一牧幸初膺遽召玉樓上巍巍千尺木輪囷  
應大匠蕩蕩萬石舟橫縱破巨浪中流頓欹側永  
與蛟龍傍黃海峰峒堯練溪水蕩漾一東南州芻  
雙淚灑總帳

題潘均堂寫親壽屏

山岩岩水深深萬木參天白晝陰幽人常愛此浮  
世遠氛塵不知秦與漢高樹自冬春

又  
天有文。河漢雲。地有文。山川樹。人有文。心口筆。參  
兩間。殫精力。雲樹蒼蒼烏雛出。老烏毛羽禿。翩翩  
巢中伏。羣雛啞啞啼。鼓翼哺反覆。巖下孝子愛殺  
爾。溫清定省畏不及。翁當七十古稀年。揮灑雲烟  
索詩句。佳句題來名士多。水活活兮山峩峩。文人  
對此足遨遊。三鳳飛來自揚州。酒進桃花三月艷。  
年年芳草碧悠悠。

秋中月

微露星河影不見。烟霧跡一片清光寒。萬里茫無  
際。銜杯一問之。至潔因無敵。頭白共娟娟。顧影含  
秋意。

挽黃泌水徵士

東城旗館始相逢。雙鬢皤然二老翁。已奪松山蓬  
島去。又招泌水玉樓中。尋常著述無知己。八十行  
藏見固窮。文采風流如雨散。蕭條長歎白沙空。

又  
流落蠻江四十年，鴛鴦常伴菰蘆邊。  
兒童朝課井晨凍，紡績夜寒爨晚烟。  
廡下不逢臯叟，顧案前端賴孟光。  
賢兩朝閱遍炎涼態，含笑滄桑赴九泉。

又

八十年來字與詩，經營慘淡費深思。  
酒酣每愛張顛草，霜落長歌白石詞。  
竹杖終朝遊爛熳，繩牀半載臥支離。  
可憐寂寞鐘聲冷，資福寺前淡家寺傍懶移。

賦得清涼破炎毒

立秋月餘暑猶盛，絺綌挂壁卷復開。  
亭午烏雀不敢下，汗湧青蠅拂還來。  
委巷窮鄉多瘡癘，醫生西延又東去。  
皇天何不愛細民，富室深居每無疾。  
一夜西來括地風，林傾雲蕩雨翻盆。  
颯颯夢驚寒刺骨，覓褐褰帷翻笥中。  
於戲今歲炎蒸聊可免，無衣無褐又愁冬。

荷莊看桂花

陰霖旬日掩柴荆  
曉霽沙柔步屣輕  
山色江干新積翠  
水光澗落舊時聲  
引人豪興金樽滿  
撲鼻寒香桂蕊橫  
纖月如鉤花弄影  
城頭暮鼓報初更

聽徐太真琴

纔喜陰雲捲  
俄驚流水音  
座中徐孺子  
花下龍唇琴  
雁落平沙遠  
樵歌入嶺深  
多君彈古調  
起我雍

門心

姚安思七十壽

五孫一子人間少  
梁孟齊眉古亦稀  
同祿在官爲祿養  
春冬膝下慶芳菲

閏中秋

秋中前日猶殘暑  
雨霽今宵露氣涼  
兩遇一年雙八月  
六旬三度閏  
端陽離離金粟枝  
頭錦皎皎玉輪地下  
霜俯仰無塵人  
靜夜寂寥秋思意  
何長

又

分外今宵明鏡徹  
嫦娥似丹整瓊樓  
露華已報霜

前信烟靄全因雨後收曾歷秋中憐皓月更經月  
滿愛涼秋廣寒當日霓裳曲沉醉三郎重疊遊

初冬荷莊野望

霜落郊原寂禾收阡陌寬紅黃叢樹變清淺一溪  
寒剩有芙蓉媚還多木葉乾次寥天宇淨山色翠  
江干

賀張道憲陞遷巡鹽御史

簡命忽聞羣雀躍乾剛獨斷慶皇猷兩淮財賦勞

宸慮四省瘡痍待憲謀久識清操充府庫特將姓  
氏卜金甌風雲再獻王褒頌豸繡霜威雨露週

輓高母馬太安人兼慰侃若兵曹

萱萎風起北庭寒寸草春暉淚不乾我母六旬猶  
未及君慈九十已承歡年登耄耋畫人間少老去蓬  
瀛仙路寬岷上白雲頻拭目遙天唯見雪漫漫

蔣秀才五十初度

林外山初紫江邊鱸正肥一觴頻侑滿伯玉始知

非起草明光裏看花上苑歸風雲他日會莫漫掩  
柴扉

苦寒行

處處層冰合風號日夜厲拔樹卷茅茨冰酒折棉  
毳手足拘不伸肝腸舒復繫秉筆向陽軒圍墻當  
陰翳凍井汲不盈飢爨烟難繼瓦雀飛檐隋山猿  
聲夜細舟車絕人行關河霜雪閉有無阻貿遷優  
游何卒歲

奉輓文林郎柳百川兼慰廷章孝廉昆季

文子不勝衣周公瑾似醇謙謙卑牧已碌碌豈因  
人自得岐黃術常療羸弱身無何天不弔揮淚溢  
邗濱

燕山勤教子一鳳已先鳴環顧階庭桂俱爲廊廟  
英膝前有顯達身後得褒榮含笑泉臺下浮雲流  
水情

黃秀才仲升二十初度

馬上翩翩年少郎棄繻當日笑終狂甘泉揣就楊  
雄賦出入金門白玉堂

踏青

樓頭忽聽子規啼紅藥翻階又幾枝女伴牽衣喧  
柳外出門腸斷草萋萋

春閨

暗把羅巾拭淚痕珠簾半卷月黃昏依稀窗外疑  
郎至却是梨花雨打門

除日迎劉道憲風雪蔽野偃仰一舟閒檢

御史園張老夫子遊李子錫萬江園

八首俯而讀之歎白雪調高陽春和寡  
勉爲次韻聊供大雅一笑

江頭古渡有芳洲邗水滌洄抱一丘風送輕舟忘  
近遠雲流策杖看沉浮山林何氏階前秀黍稷當  
時谷口稠豸繡優閒來嘯咏野人無計得追求  
登臨恣意向江天懶困汀洲沙鳥眠花落農耕紅

兩溼月明人夢綺樓偏龍鱗松老蟠今古鐵幹梅  
橫閱歲年踏遍蒼苔迷出處到來真是絕塵緣

竹覆牆頭烟樹合石門陰雪暑全無書藏綠野渾  
經史人在清湄足典謨晚聽驅牛歌牧豎晨看種  
秫課獠奴林中逸事供幽賞還結高陽舊酒徒

主人

好留  
客飲

疊石開渠山徑崎芙蓉霜老桂交枝亭臺高下光  
輝遠烟雨晴明景物宜雁掠橫塘鳴皓月心如秋

水徹清池東籬最愛陶潛菊滿地黃花幾首詩

遙望山林逸興多前身應是住巖阿梅開雪滿誰  
高臥雲破月來足咏哦却羨金魚多衣紫莫嫌白  
髮少顏酡生平磊落無人識偶遇孫陽一嘯歌

自怪一生幽興癖馬蹄不惜去程遙東南翠滿鋪  
晴嶺天地青空湧暮潮黃屋層臺京口近焦山叢  
樹海門饒鑿輿六幸恩膏遍士庶千年憶帝堯  
巍巍萬歲幾千春俯仰須臾跡已陳渭水垂綸終

濟世箕山洗耳竟藏身黃金臺上名原假白玉堂  
前才未真多少奔馳營利客何如此地樂清貧  
嘯傲烟霞是一生青蓮痛飲醉怡情林開委曲柴  
桑徑園伴清操御史名君子遙臨看鶴舞美人登  
眺聽鸞鳴陽春高調原難和下里俚音愧百城

宣州道

溪流斷石水潺湲出岫烟雲滯往還疊嶂橫嵐疑  
作雨居然一幅米家山

己亥

賀劉道憲榮任

福星春日照邗濱聖主躊躇拔衆臣繡水清操堅  
學力龍標潔白見天真二賢昔政稱雙美兩體前  
徽在一人驄馬遙臨雲際鶴萋萋碧草色回新

送潘均堂旋里祝親壽

一路鶯啼花發紅歸鞭遊子醉春風介眉酒熟人  
多興樓上凝妝堂上翁

易園梅花

春寒三尺雪日煖一庭梅高士巡簷立佳人帶月  
來天青逾皎潔頭白共低徊寂歷懸巖下誰侵半  
點埃

吳司錄虞三四十初度

雪盡風初煖清明桃發榮門前騎馬客堂上介眉  
觥劍挂延陵契帛書御史名當春逢不惑鳥語雜  
歌聲

高友蘇入泮

翩翩年少出氛塵馬上春風醉裏行雲路由來先  
泮水扶搖九萬看鵬程

程黍谷入泮

滿耳鶯聲滿眼花滿城彩幃滿街誇今朝采得芹  
歸去甲第從茲振舊家

程禹甸入泮

泮水遨遊邗水濱青雲最次青年人銀鞍白馬垂

鞭去花滿沙堤踏繡茵

牡丹

凝露東風穀雨寒翠幃掩映醉朱闌巫雲一朶憐  
春暮月落鶻啼血未乾

鷓鴣聲裏花飛雨楊柳堤邊馬逐塵三月東風易  
搖落一枝紅豔哭殘春

春盡日看演牡丹亭

夜來酥雨開紅藥朝入梨園看牡丹今古相思渾

是夢可離花畔泪闌干

舟下鑿江路過荷莊流連賦此

殿春搖落晝初長河上清和麥秀凉似絮柳花忙  
蛺蝶如錢荷葉趁鴛鴦縱橫滿地虞姬美燦爛翻  
堦紅藥香多少芳菲人不見輕舟暫泊意徬徨

汪二聖宣攜時魚旨酒再過荷莊看芍藥

重過郊園愛碧天藥欄簇簇彩雲偏柔姿不減風  
前色媚態還輸雨後妍魚以當時兼味美花因出

相盛名傳汪倫勸飲情  
千人酩酊拚扶上小船  
暑月汎舟  
兩岸綠陰交櫟柳  
一溪明月沸笙歌  
風微漸覺絺衣薄  
香淨遙聞荷芰多

挽易爾康

憶成別墅共題詩  
四載優閒曲徑怡  
對鏡莫嫌勲業晚  
銜杯常笑豔陽時  
備經創闢千山險  
環顧開來三鳳奇  
最是驚心多涕出  
八旬親哭六旬兒

七月稱介眉  
六月歌薤露  
未踐南山嵬  
先登北邙路  
莽莽天地間  
何奪斯人速  
浩蕩望無涯  
橫流溷四瀆  
灑灑沒瞿塘  
三峽日奔逐  
誰復挽狂瀾  
斯人已云歿  
一東南州芻  
總幃盡一哭

秋喜

暑氣連旬酷  
窮山火亦燃  
奇峰絕萬里  
赤日獨中天  
一夕風迴月  
三更雨破煙  
曉披香雪薄  
一葉井梧偏

奉送李銀臺兼呈向兵曹

江干瞻紫氣班馬鳴蕭蕭八視淮鹺政兩河財賦  
饒輪困持節榦枝葉棄微條他日恩綸下寇恂借  
聖朝

只識錢刀重誰通緩急中心似石轉吾面不雷  
同劉寵空今古高柴善始終金蘭深契誼國士繼

休風

劉道憲慨然允庫以完銀臺獻  
帑高兵曹持籌握筭曲全始終

真江喜晤江電文

善度曲

雨後松梢月風前蘆荻秋十年吳下友一聚水邊  
樓曲妙翻新調簫幽咽舊愁行雲無住著舒卷大  
江頭

秋雨

颯颯西風雨初聞葉上乾波流湘簟滑雲拂葛衣  
單谷口稻花翠江干魚簖寒漸欣殘暑退秋思有  
憑欄

黃光祿林園招飲

肩輿五里到郊園暑退蕭蕭蘆葦天翠滴江嵐秋  
雨後香傳金粟晚風前亭臨廣陌花生豈水漲橫  
塘萍壓蓮山谷近來遊興逸有花時節醉年年

真江讌集不得鱸魚志慨

水滿汀洲烟滿湖晚晴山色屬樓孤風前猶有王  
恭柳雨後全無張翰鱸月學扇時臨綺席酒生香  
處憶當壚明朝小艇邗溝路兩岸紅黃勝畫圖

賦得風雨阻歸舟

遙望邗江路菰蘆夾岸流終風翻浪白急雨打船  
頭不著還山屐依然伴水樓明晨秋霽好緩緩問  
歸舟

真州同友人西郊散步

用西字

雨歇空林道雙鞋不染泥春風競郭北秋景在城  
西絳葉飛雲寺清波漾虎溪江山夕照裏嵐氣水  
烟齊

九月五日潘海觀河稼堂讌集

雪屯言  
荀齋堂  
穿林避市步畦塍雨後天高秋水澄彭澤樽攜問  
稼叟雍門琴聽法雲僧芙蓉似醉迎人媚粃稬如  
陵樂歲登九日風烟隨處好滿山紅紫月初升

壽太夫人程母六十

世間何處問蓬瀛滿耳笙歌邗水濱四鳳九重公  
輔器孀闈一品太夫人介眉花甲中山酒庾嶺梅  
香十月春天意融和人意好舟車歷亂慶嘉賓

壽歲進士汪斌四十

汪倫深契誼四十早知名嶺上梅初煖堂前酒滿  
傾寒松老歲月仙果晚生成莫負強年日笙歌達  
五更

舟下鑿江

小艇西南下一溪烟雨晴風迎棉畏薄潮落槩催  
行白舳鬣頭潔綠楊水面橫舟航垂老厭隴上幾  
時耕

西郊即事

潘子海觀新卜草堂于鑿江之西郊十月三日招同人飲酒賦詩天氣融和安步徐吟致足樂也總得如干首以志之

臥虎山頭紅葉多野鴉羣噪占寒窩馬蹄踏遍空林道晴日西風拂面和

秋盡尋秋何處尋多在郊原少在城沙軟長隄霜變葉滿山錦繡罕人行

法雲山畔高低路曲水溪邊淺淡波霜落一畦冬菜熟農家雪滿禦寒多

偶叩禪關關不開呼童掛壁抱琴來山中無限秋光好偏戀紅塵去不迴

苔合苔分來若明小陽小閣試琴聲高山仰見飛紅紫流水俄驚指下生

高僧名士兩風流琴滌煩囂簫滌愁古調新聲更迭奏碧空鳧落嶺雲留

遙見江千波浪清青峰晴日更分明微風遠近漁

帆出短笛一聲夕照橫

問稼堂前問老農  
檻邊歷歷指晴峰  
浣花小築棲真隱  
漫道南陽有臥龍

新篁十畝直參天  
曉籟清風和澗泉  
彩鳳翱翔明月下  
龍吟秋夜起寒烟

澱澱池塘烟柳合  
斜連茅屋晚雞號  
河陽隙地頻商酌  
三月春風好種桃

恭賀鹽漕張御史留任

常年豸繡望雲霓  
誰識官家自有期  
公綽廉明愁去日  
寇恂潔白喜留時  
威行楚粵驅逋販  
恩洽淮揚慰夢思  
孔邇興歌真父母  
風雷雨露總相宜

冬日江行

翳翳疎林霧濛濛  
細雨消秋深紅遍野  
冬至綠全凋蓬底斜  
初月江寒小暮潮  
西風吹日脚霜落霽  
明朝

仲冬

仲冬寒氣薄溪迥練微波桀打岸行急縶牽泥滑  
多雲霞看祀稭婦子自婆娑茅屋綢繆了朔風奈  
爾何

恭賀劉運憲攝院篆

鐵冠暫假恩威濟揮霍襟懷秋氣橫季布千金堅  
允諾仲由片語戴廉明兩淮雨露商民遍四省風  
雷逋販驚豸繡推遷綠繡水龍標繼起卜公名

雪邨詩二集

庚子

王訪

恭迎園園張御史入覲迴任

旌旆遙臨賦序移春風湛露喜籠眉雲開雉尾朝  
天日經理絲綸補袞時府庫頻年勤碩問江淮一  
柱砥流澌北歸雪滿遲鞍馬新拜皇恩雨澤施

邵湖夜泊

去揚四十里極目水迢迢雪密燈光斂舟輕舄激

搖如何春半月祇見日三朝快取中山酒酩酊過  
客宵

城郭多囂競孤舟絕四隣斜連僅草屋漭沆泊湖  
濱暫解塵中事聊爲世外身風狂眠未穩起視月  
如銀

浙瀝篷窓外回風舞雪散荒村沽魯酒初日對周  
生月淡澄湖凍烟輕官柳晴鑿冰強舟楫寸步萬  
篙撐

買舟三百里十里終朝行遲暮原吾道翻飛羨鳥  
情僕寒頻夜語鶯煖待晴鳴風雪思歸計躊躇達  
五更

梅

雪滿根培固氣和枝發榮幽姿無俗韻寒骨有奇  
情常愛月爲伴還愁風作聲空山多寂歷溪谷播  
芳名

三月十五夜看海棠

着雨濃春暮夕陽霽晚烟片雲姿共媚圓月態逾  
妍似睡臨風怯初醒浥露鮮可堪雙鬢白紅樹又  
啼鶻

黃礪山招同人看牡丹徐太真鼓琴花下  
楊柳烟濃杜宇鳴紅塵走馬出江城彩雲態倚春  
風媚凝露香湏穀雨生檀板從來爭艷賞金徽誰  
識暢幽情南州一曲雍門意富貴蒼前月倍明

奉輓恭人錢太君兼慰園張御史

雲流電掣古今空歎我恭人賢孝重紡績燈傍陪  
夜讀羹糜堂上佐朝饗初膺豸繡途聞喜再錫泥  
封寵遇濃四十九年勤井臼三千餘里隔音容廣  
陵風雨愁添淚楚水潺湲恨滿胸一束生芻歌薤  
露節哀強起報飛龍

城東荷花小飲

東城圖畫裏四顧水雲寬短服遵澁徑殘陽碎急  
湍芰荷千頃艷絺綌五人寒隨飲莓苔上酩酊忘

路難

秋下真江

扶病趨行役勞勞心獨違  
天空鴻鴈疾水足稻梁肥  
萬木寒蟬響孤舟明月歸  
早知塵世幻理料掩荆扉

有慨

長年次第去吾道自應孤  
可惜聖明主如何隱釣  
夫鹽車絆老驥天地困寒儒  
長嘯楓林下高陽問

酒徒

易園賞海棠

雨過含嬌艷新粧斷客腸  
况當秋景薄復此月昏黃  
喚僕高燃燭教人屈進觴  
綺筵扶病至逸興老逾狂

少年行

碧霄豪氣上長劍倚雲中  
掛臂雕弓勁調鞍宛馬  
雄有時起秋思無夜不春風  
冷笑拘墟客難圖萬

里功

真江見月

梧桐一夜雨紅葉滿江城露洗積雲淨風搖新月  
生星河秋思遠砧杵暗魂驚作客須憑酒婉孌伴  
短檠

見花

見花常濺淚春鳥向人驕蘭蕙滋秋圃菰蘆拂晚  
潮情歸周小史威入霍嫖姚歎息繁華裏愁腸斷

玉簫

秋舫

抱病舟中目擊口吟  
賦詩三章以寫之

平明催解纜帆滿受風斜兩岬香秔實一畦蕎麥  
花草黃羸牧犢水落飽漁家漸喜南來翠晴看山  
色賒

疎林寒露溼曲浦晚潮收荻葉風頻激草根蛩迭  
愁孤鴻無遠塞多病畏虛舟吾老堪從役蹉跎愧  
白頭

連朝寒氣薄蕭瑟白叢蘆飲少牀無寐秋高肺漸  
蘇延醫速愈藥拜鬼願靈巫多少悲生事紛然入  
舳艫

次韻荅潘均堂秋夜放舟維揚之作

淮水兼天湧纔欣兩岸平夕波金錯落晴樹月光  
明萬籟清寒夜孤舟忘世情舉杯頻論舊不遠廣  
陵城

汎舟

蕪城連夜雨曉出汎舟涼季子裘堪擁張翰鱸正  
香烟淡湖水濶雁度海雲茫兩岸紅黃葉西風醉  
夕陽

九月五日西郊散步再至潘司馬問稼堂

節臨九日曉風涼閣淡寒林未醉霜花縣隔年桃  
樹滿石門重過桂叢香鷗輕接翅翻晴浪漁唱開  
罾網夕陽把酒莫嫌江上晚南山初月照滄浪

九日舟中作

碧落雲晴入遠空一溪如練色遙同霜林葉赤侵  
朝日画板船輕快曉風宗慙何勞萬里浪張騫多  
事汎仙宮眼前白小曾來美退結漁家百尺洪  
慷慨悲歌常倚棹愁腸層疊似波紋寒楓凋後偏  
璀璨香稻蕪殘半水雲日照艸根蟲細語風吹葉  
落鳥無聞蕭條又值重陽節酒熟螯肥對夕曛  
登山在昔能防疫汎水于今可袪除肺病少陵秋  
漸愈途窮大阮酒難疎沙堤驛路朝騎馬澤畔人

家夜網魚滿目悲生何日了夕陽歸去掩吾廬

友人贈菊

我有五柳興君憐三徑斜因衝紅葉雨爲補東籬  
花雲氣生虛室晴光落彩霞稜稜勁晚節霜霰莫  
能加

秋杪舟行

杪秋饒爽氣霜落樹林妍絳葉浮寒水青山淡遠  
天注來鴻與燕今古霧如烟慷慨憑杯酒彭殤屬

偶然

黃葉真州路迷離兩岬奢悠悠秋水濶隱隱南山  
斜嶺月明樵徑江風冷釣家螯肥鱸正美沽酒醉  
蘆花

獨上篷窓望雲空稻穫完簸揚憐瘦婦負戴忍輸  
官農有溪畊苦漁因守釣寒茫茫天地內生計屬  
艱難

返棹

秋盡天空濶霜林遍綺羅青山南去遠黃葉北來  
多畫舫分晴練殘陽碎夕波落帆城郭靜新月滿  
庭柯

病歎

憶六十年前坎壈憂虞凍餒纏其身鶉衣不慕浮  
雲貴狐貉馬驕陋巷貧獻賦一生嗟未遇藏珠終  
老歎無因滄江歲晚驚多病雪煖寒梅待曉春

仲冬三日荷莊新亭落成黃光祿礪山招

飲同人 得成字

冬日招遊愛日晴園亭叔度樂新成蕪城霜落沙  
堤軟鐵甕山分眉黛清臺出崎嶇綠石磴窓開豁  
達聽江報東風孃孃還攜妓明月梅花快一生

主人

欲于梅開時  
携妓醉遊

賓主東南意氣橫風流儒雅共知名步兵愛酒幽  
情遠光祿能詩逸興生千頃波澄寒月影疎林霜  
翠夕陽明汀烟漠漠忘塵世漁唱農歌樂歲成

辛丑

潘子均堂仲弟鳧遠叔弟濬九皆賢士也戊  
戌尊嚴七十壽旋里稱觴余作詩贈之今  
年又當尊慈七旬屆期亦係春仲余雖臥  
疴在榻聞之不勝雀躍爰作歌志喜兼壯  
其行又以著天倫之樂云

東山峩峩漢水深喬木鬱葱雲霧中水有源木有  
本千章萬派出無窮積不厚流自薄有德之人天

必佑八龍五桂已云舊君不見巖下孝子潘三鳳  
大略雄才寄揚州十年花月醉遨遊椿闈已慶古  
稀壽又值七旬萱堂茂風雪迢迢蔽天涯三騎聯  
翩不厭厚老夫臥病喜坐起羨爾高堂白髮之雙  
親羨爾雁行無故恭且友還羨江南桃花二月開  
介眉酒進三萬六千斗



